


He Whakatau

Me mātua pānui kia mārāma rawa koe i ngā whārangi 8–14 o tēnei pukapuka.

He whakarāpopoto

Pānuihia te whakarāpopoto ki te ākonga. Kotahi noa iho te hiahia o Hinemaia rāua ko tōna pāpā, he kimi i ētahi taputapu hangarua hei hanga i tētahi taonga. Kātahi ka puta te whakaiti hei whakamamae i a Hinemaia. Hei te mutunga ko Hinemaia te whetū o te rā. He aha i pēnei ai?



He kupu whakataki

Kia kaha ki te whakamahi i ngā wheako, me ngā mōhio o ngā ākonga. Kia hāngai tonu te whakatenatena, ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me mahi rawa te kupu taka me ngā whakaahua kei te uhi. Me whakamaumahara hoki te ākonga kia pātai ki a ia anō, i te wā e pānui ana ia mai i te tīmatanga ki te mutunga o te pānui.

Me āta matapaki he aha te tōneke, ā, he aha ngā taputapu hei mahi tētahi tōneke? Pēnā i te rapu taputapu hangarua koe hei mahi tōneke mōu he aha atu anō etahi ka tīkina e koe? Tērā ka taea e koe te whakahoahoa i tōu ake tōneke. Mēnā ko koe tērā i kapekapehia e ngā tokorua i te kura ka aha koe?

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārāma ana mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga mō tana tiro ki mua i whakaputa ai ia i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini whitireo, i tōna kotahi rānei;
- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha ngā para hangarua i whakamahia e Hinemaia rāua ko Pāpā hei mahi i te tōneke?
2. He aha ngā tokorua i whakato ai ki a Hinemaia i tōna taenga ki te kura i te Rāhina?
3. He aha a Hinemaia i tapa ai i tana tōneke ko Uira?
4. He aha te hua i puta mai i te kata a te tokorua ki a Hinemaia rāua ko tōna pāpā?
5. He aha ki a koe te tino tikanga o te hangarua?

Ngā whakautu ki ngā whakapuaki māramatanga

1. Tētahi moua tino tawhiti, tētahi waka kawē kai, me tētahi tūru.
2. I kite rāua i a Hinemaia rāua ko tana Pāpā e hamuhamu ana i roto i ō rātou parapara.
3. Nā tōna tino tere.
4. Kāre a Hinemaia i pupuri i te riri ki a rāua.
5. He maha ngā whakautu rerekē.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te He Tirohanga Whānui mō ngā tino āhuatanga o te pukapuka nei.

Te pūtake

T He tipako i tētahi raupapatanga whakanui mai te pukapuka.

He whakatakinga ā-roto, he whakaharatau

Me matapaki rawa te huarahi i whāia e te tokorua ki te whakarite i tētahi tōneke. Āta whakamahia rawa ngā pikitia hei tautoko i te matapaki kia kite te ākonga ko te reo e whakamahia ana e kōrua he reo whakahokinga whakaaro. Kia mutu te pānui a te ākonga i te pukapuka, ka mātai, ka tipako, ka tuhi i ngā āhuatanga o te whakahere me te mahi i te tōneke. Kia puta te reo whakaraupapa me te whakahokinga whakaaro.

Tā te pukapuka

Tā kōrua i whakaharatau ai

- Tuatahi ko te papa.
- Tuarua ko ngā wira.
- Nā Pāpā i whakarite ko te papa o te tōneke hei mahi tuatahi mā māua.
- I muri i tērā ka whakamau a Pāpā i ngā wira.

Hei whakawhanake ake i te ākonga me tuhi ā wā taka tana whakamārama.